

Seni silat jadi 'daya tarik' pusat kraftangan

PERTUNJUKAN silat telah menarik ramai pelancong dan orang-orang setempat ke kawasan pentas kecil di Pusat Kraftangan (SHC) di Tanglin, pada malam Selasa lalu.

Inilah kali pertama satu persembahan budaya Melayu disediakan dalam acara Pasar Malam di sana.

Berbagai jurus, gerakan tangan pembukaan, pertahanan diri dan serangan telah ditunjukkan dalam pertunjukan budaya Melayu di Pasar Malam itu.

Beberapa orang anggota Persatuan Bawean Singapura (PBS) dan kumpulan silat Kuningan telah mengadakan pertunjukan tersebut dengan iringan bunyi-bunyian gong, celempong dan rebab.

Gerak perlahan

Pertunjukan itu bermula pada 7.00 malam. Pesilat-pesilat itu, yang dipimpin oleh Encik Basri Alang, telah memperlihatkan permainan secara gerak perlahan atau 'slow motion'.

Ini termasuk perlawanan menggunakan senjata seperti pedang, serangan kaki dan tangan dan cara serangan-serangan itu dipatahkan.

Selain dari kumpulan itu, satu lagi kumpulan budaya Melayu dari Balai Rakyat Dover Road, juga telah menyahut seruan Lembaga Penggalak Pelancong (STPB) untuk menyajikan acara-acara mereka sendiri pada malam tersebut.



● SALAH satu langkah dan cara mematahkan serangan dalam pertunjukan silat di pentas kecil Pusat Kraftangan Singapura, sempena Pasar Malam di Tanglin. — Gambar BH oleh Arthur Lee.